

Era nus essan mammals

In nov cudesch d'uffants rumantsch fascinescha era creschids

DAD AUGUSTIN BEELI

■ **Curt avant Nadal è cumpari in cudesch rumantsch cun il ti-tel «Mammals». Igl è ina ovra remartgabla. Fitg bleras illustraziuns or dal mund dals animals, tut en color, dattan en egl.**

La noziun «mammals» è anc in pau nova en terra rumantscha. Il cudesch tracta la spezia dals animals lactants dal mund. L'emprima sfegliada atras il nov cudesch dals mammals persvada: Quel stos jau cumprar per mes uffants. Igl è stà in regal bainvesì. Il di da Nadal, suenter la saira dals pacs, hai jau stuì preleger l'emprima giada or dal cudesch dals mammals. «Vairamain interessantas chaussas datti, quai na avess jau betg pensà», vai atras il chau. Mes uffants èn stads fascinads cura ch'jau hai avert la pagina che mussa in tagl atras la tauna da la talpa. Jau sai ussa ch'els observan primavaira proxima pli exact ils munts da talpas durant la spassegiada sur il funs. Mes uffants han era grond gust da la pagina che mussa la nashientscha da giattels. E pir la pagina da la schimgia e quella dal pitschen kenguru da bennett...

Elefants sin solas da gumma

Il cudesch dals mammals ch'i dat ussa l'emprima giada per rumantsch è emplenì cun illustraziuns intimas, animantas e charinas d'animals. Kengurus, chauns sgulants, giats, chavals, vatgas da mar, opossums, urs e blers auters vesan ins en il cudesch dals mammals. Apropos mammals: «Mai dudi quest pled», hai jau pensà a l'entschatta da l'emissiun da radio che ha da curt preschentà il nov cudesch rumantsch. Igl è in bel pled. A l'entschatta dal cudesch dat ina pagina curt e bain survista dal mund dals mammals. Utschels èn betg mammals, insects e reptils er betg. Nus umans percunter essan mammals. Sin il mund essan era nus ina spezia dad animals lactants.

Sco en tuttas spartas na chatta ins betg il gust vi d'in cudesch sfegliant mo a la svelta. Mummas, babs, tattas e tats che sfeglian sa laschan prest sezs fascinar. Tgi saveva che l'elefant chamina atras la dschungla sin solas da gumma? Tgi saveva che las mieurs sa sfraidan senza mangiar cuntinuadamain? Tgi ha già observà ils mauns d'ina schim-


gia, quels sumeglian propi quels da nus umans.

Nova collecziun «egls averts»

Numerusas chaussas fitg interessantas cuntegn il cudesch dals mammals. En blers chapitels sa fatschenta l'ovra cun temas en tturn la vita dals mammals. La derivanza, mammals che sgolan, ils dents, fastizs, la funcziun da la cua, sa defender, invista en il gnieu da stgilats e mieurs e blers auters temas fascineschan vairamain. Il suttitel dal cudesch sa cloma lu era: «Ils mammals ils pli fascinants dal mund – lur istorgia e lur vita». Jau crai che mes buob e mia matta sappian vairamain profitar da quest nov cudesch rumantsch. Informaziuns or dal mund da la natira e dals animals – en rumantsch – èn raras. Quai ha l'Uniun Rumantsch Grischun probablamain er constatà. Il cudesch dals mammals è l'emprim tom d'ina nova collecziun che sa numna «egls averts». Betg lungas istorgias cun bler text e formulaziuns cumplitgadas gidan oz a promover il rumantsch. Gliued giuvna – ma adina dapli era creschids – vul s'informar svel, vul chaussas attractivas, vul colurs, tut simpel e divertent.

In zichel avertadad

Tge uffant n'ha betg plashair da chauns, giats, lieurets, erizuns ed auters animals? Sco ch'i funcziuna en il mund dals animals lactants intermediéscha il cudesch dals mammals fitg bain. Jau almain hai fitg gust da questa nova ediziun che l'URG ha organisà. Sch'il cudesch è stampà quà en Svizra u betg, nun è impurtant. Daniel Telli ha translàtà ils texts engles da Steve Parker en nos linguatg. Per motifs da custs sto quai ozendi esser cler ch'ins na po pli pajar ediziuns en divers idioms. Il cudesch dals mammals è scrit en rumantsch grischun. Dasper la fascinaziun per in bel cudesch e per ils animals dovri dals creschids anc in zichel avertadad e bunaveglia dad acceptar il rumantsch da scrittira unitg. Il cudesch dals mammals pon ins cumprar daptut nua ch'i dat cudeschs rumantschs.



Il frontispezi dal nov cudesch d'uffants rumantsch.